

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৯০/২০১৭

ঢাকা, রোববার ৭ মে ২০১৭, ২৪ বৈশাখ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। মেরিন ড্রাইভ উদ্বোধন করলেন প্রধানমন্ত্রী : ১৬ প্রকল্পের উদ্বোধন ও ভিত্তিপ্রস্তর স্থাপন
- ২। ইয়াবা ব্যবসায় জড়িতদের কঠোর শাস্তি হবে : প্রধানমন্ত্রী
- ৩। রাষ্ট্রপতি কবিগুরুর স্মৃতিবিজড়িত পতিসরে যাচ্ছেন আগামীকাল
- ৪। দারিদ্র্য দূরীকরণে দৃষ্টান্ত স্থাপন করেছে বাংলাদেশ : অর্থমন্ত্রী
- ৫। বাংলাদেশ এখন উন্নয়নের রোল মডেল : শিল্পমন্ত্রী
- ৬। জঙ্গিবাদ সমস্যা নিয়ে সবাইকে সমস্বরে কথা বলতে হবে : কৃষিমন্ত্রী
- ৭। সরকার বিদ্যুৎ উৎপাদনে নতুন আইন করেছে : আইনমন্ত্রী
- ৮। শিক্ষায় পিছিয়ে থাকলে স্বনির্ভর হওয়া যাবে না : শিক্ষামন্ত্রী
- ৯। শিশু-কিশোরদের জঙ্গি-মাদক থেকে দূরে রাখুন : তথ্যমন্ত্রী
- ১০। জঙ্গিবাদ দমনে নতুন একটি ইউনিট হচ্ছে : আইজিপি

১। **মেরিন ড্রাইভ উদ্বোধন করলেন প্রধানমন্ত্রী : ১৬ প্রকল্পের উদ্বোধন ও ভিত্তিপ্রস্তর স্থাপন**

বাংলাদেশ বিমানের বোয়িং উড়োজাহাজ মেঘদূতে চড়ে গতকাল ৬ মে শনিবার প্রথমবারের মতো কক্সবাজার আসেন প্রধানমন্ত্রী শেখ হাসিনা। এর মধ্য দিয়ে দেশের প্রধান পর্যটন নগরীতে সুপারিসর উড়োজাহাজ চলাচলেরও সূচনা হয়েছে। এ সফরে প্রধানমন্ত্রী কক্সবাজার থেকে টেকনাফ পর্যন্ত দীর্ঘ মেরিন ড্রাইভ সড়ক, কক্সবাজার মেডিকেল কলেজ উদ্বোধন, দুটি এলএনজি টার্মিনালসহ বেশ কয়েকটি প্রকল্প উদ্বোধন ও ভিত্তিফলক উন্মোচন করেন। ঢাকা থেকে প্রধানমন্ত্রীকে নিয়ে রওনা হয়ে সকাল ১০টায় কক্সবাজার বিমানবন্দরে পৌঁছায় বাংলাদেশ বিমানের বোয়িং ৭৩৭-৮০০ মডেলের উড়োজাহাজ মেঘদূত। উড়োজাহাজটি কক্সবাজারের সম্প্রসারিত রানওয়ে ব্যবহার করে নামার পর বিমানবন্দরে বড় আকারের উড়োজাহাজ চলাচল উদ্বোধনের পর মোনাজাত করেন প্রধানমন্ত্রী শেখ হাসিনা। সেখান থেকে তিনি সড়কপথে যান ৩৫ কিলোমিটার দূরের ইনানী সৈকতে। সেখানে প্রধানমন্ত্রী কক্সবাজার কলাতলী থেকে টেকনাফ পর্যন্ত সমুদ্রের পাড় দিয়ে চলে যাওয়া ৮০ কিলোমিটার দীর্ঘ মেরিন ড্রাইভ সড়কের উদ্বোধন করেন। এর আগে তিনি সড়কটির অন্তত ৪৫ কিলোমিটার ঘুরে দেখেন। বিকালে প্রধানমন্ত্রী শেখ হাসিনা আন্তর্জাতিক ক্রিকেট স্টেডিয়ামে জেলা আওয়ামী লীগ আয়োজিত বিশাল জনসভায় প্রধান অতিথির বক্তব্য রাখেন। সমাবেশস্থলে পৌঁছেই তিনি সাতটি উন্নয়ন প্রকল্পের উদ্বোধন ও নয়টির ভিত্তিপ্রস্তর স্থাপন করেন। সূত্র-সমকাল (পৃ.২,ক.৬), জনকণ্ঠ (পৃ.১,ক.৬), বাংলাদেশ টুডে (পৃ.১,ক.২), ডেইলি সান (পৃ.১,ক.৫)।

২। **ইয়াবা ব্যবসায় জড়িতদের কঠোর শাস্তি হবে : প্রধানমন্ত্রী**

কক্সবাজার থেকে সারাদেশে ইয়াবা সরবরাহে জড়িতদের বিরুদ্ধে কঠোর হুঁশিয়ারি উচ্চারণ করে প্রধানমন্ত্রী শেখ হাসিনা বলেছেন, এই ব্যবসার সঙ্গে সংশ্লিষ্ট সে যেই হোক না কেন তাকে কঠোর শাস্তি পেতে হবে। তিনি বলেন, ইয়াবা সরবরাহ বন্ধ করতে হবে, এর সঙ্গে যারা জড়িত তাদেরকে শাস্তি পেতেই হবে। তাদের কোনরকম রেহাই দেওয়া হবে না। প্রধানমন্ত্রী শেখ হাসিনা গতকাল শনিবার ৬ মে কক্সবাজারের শেখ কামাল আন্তর্জাতিক ক্রিকেট স্টেডিয়ামে বাংলাদেশ আওয়ামী লীগ কক্সবাজার শাখা আয়োজিত বিশাল জনসমাবেশে প্রধান অতিথির ভাষণে একথা বলেন। সূত্র-সংবাদ (পৃ.১,ক.৬), ইনকিলাব (পৃ.১,ক.৬), ইন্ডিপেনডেন্ট (পৃ.১,ক.৭), ডেইলি সান (পৃ.১,ক.৬)।

৩। **রাষ্ট্রপতি কবিগুরুর স্মৃতিবিজড়িত পতিসরে যাচ্ছেন আগামীকাল**

আগামীকাল ৮ মে সোমবার ২৫ বৈশাখ। রবীন্দ্রনাথ ঠাকুরের স্মৃতিবিজড়িত নওগাঁর পতিসরে এবার জাতীয়ভাবে পালিত হবে কবির ১৫৬তম জন্মবার্ষিকী। রাষ্ট্রপতি মো. আবদুল হামিদ এদিন জন্মবার্ষিকীর অনুষ্ঠানের উদ্বোধন করবেন। প্রথমবারের মতো দেশের কোনো রাষ্ট্রপতি পতিসরে আসছেন। এ জন্য রবীন্দ্রনাথ ঠাকুরের কালিগ্রামের পতিসর কাচারিবাড়ি এলাকা ঘিরে চলছে সাজসাজ রব। সূত্র-সমকাল (পৃ.২,ক.৮), ইনকিলাব (পৃ.৮,ক.১), নিউজ টুডে (পৃ.২,ক.৫)।

৪। **দারিদ্র্য দূরীকরণে দৃষ্টান্ত স্থাপন করেছে বাংলাদেশ : অর্থমন্ত্রী**

দারিদ্র্য দূরীকরণে বাংলাদেশ বিশ্বে দৃষ্টান্ত স্থাপন করেছে। ১৯৭৩-৭৪ সালে আমাদের দারিদ্র্য ৭০ ভাগ ছিল। ৪০ বছরে তা কমে এখন অর্ধেকের এসে দাঁড়িয়েছে বলে জানিয়েছেন অর্থমন্ত্রী আবুল মাল আবদুল মুহিত। তিনি বলেন, দারিদ্র্য কমানো এখন সরকারের উদ্দেশ্য। কারণ, এখনও জনসংখ্যার এক পঞ্চমাংশ দরিদ্র। তবে বর্তমান সরকারের বলিষ্ঠ নেতৃত্বে দারিদ্র্যতা সহনীয় মাত্রায় নামিয়ে আনা সম্ভব। গতকাল শনিবার ৬ মে এশীয় উন্নয়ন ব্যাংকের (এডিবি) বোর্ড অফ গভর্নর্সের ৫০তম বার্ষিক সভার প্যানেল আলোচনায় অর্থমন্ত্রী আবুল মাল আবদুল মুহিত এ কথা বলেন। সূত্র- সংবাদ (শেষ পৃ.,ক.৫), ইন্ডিপেনডেন্ট (শেষ পৃ.,ক.২)।

৫। **বাংলাদেশ এখন উন্নয়নের রোল মডেল : শিল্পমন্ত্রী**

শিল্পমন্ত্রী আমির হোসেন আমু বলেন, বাংলাদেশ এখন উন্নয়নের রোল মডেল। বিশ্বের উন্নয়নশীল অনেক দেশ বাংলাদেশের এগিয়ে যাওয়ার কৌশল অনুসরণ করছে। আগামী পাঁচ বছর পর বিদেশি জনশক্তির কর্মসংস্থানের জন্য বাংলাদেশে আসবে। প্রধানমন্ত্রী শেখ হাসিনার দৃঢ় নেতৃত্বের কারণেই বাংলাদেশ মধ্যম আয়ের দেশে পরিণত হচ্ছে। গতকাল ৬ মে শনিবার ঝালকাঠিতে লার্নিং অ্যান্ড আর্নিং মেলার উদ্বোধন করে শিল্পমন্ত্রী এসব কথা বলেন। সূত্র-সমকাল (পৃ. ৭, ক.১), ইনকিলাব (পৃ. ৫, ক.১)।

৬। **জঙ্গিবাদ সমস্যা নিয়ে সবাইকে সমস্বরে কথা বলতে হবে : কৃষিমন্ত্রী**

নিজ নিজ ক্ষেত্রে উল্লেখযোগ্য অবদান রাখার স্বীকৃতি হিসেবে বছরের আলোচিত ১০ জন নারী পেয়েছেন ‘অনন্যা শীর্ষদশ সম্মাননা-২০১৬’। গতকাল শনিবার ৬ মে এক অনুষ্ঠানে তাঁদের সম্মাননা জানানো হয়। রাজধানীর কৃষিবিদ ইনস্টিটিউট মিলনায়তনে পাক্ষিক অনন্যা আয়োজিত অনুষ্ঠানে প্রধান অতিথি কৃষিমন্ত্রী মতিয়া চৌধুরী সম্মাননা পাওয়া নারীদের উত্তরীয় পরিয়ে সম্মাননা পদক ও সনদ হাতে তুলে দেন। কৃষিমন্ত্রী তার বক্তব্যে বলেন, জঙ্গিবাদ সমস্যা নিয়ে সবাইকে সমস্বরে কথা বলতে হবে। সূত্র-প্রথম আলো (পৃ. ১৪, ক.২), ইত্তেফাক (শেষ পৃ., ক.৫), ডেইলি স্টার (পৃ. ৩, ক.২), এশিয়ান এজ (শেষ পৃ., ক.৩)।

৭। **সরকার বিদ্যুৎ উৎপাদনে নতুন আইন করেছে : আইনমন্ত্রী**

আইনমন্ত্রী অ্যাডভোকেট আনিসুল হক বলেছেন, বর্তমান প্রধানমন্ত্রী শেখ হাসিনার নেতৃত্বে সরকার গঠনের পর আজকে দেশে ১৫ হাজার মেগাওয়াট বিদ্যুৎ উৎপাদন হচ্ছে। বর্তমান সরকার বিদ্যুৎ উৎপাদন পদ্ধতি সহজ করার জন্য নতুন আইন করেছে। আগামী ২০২১ সালের মধ্যে দেশে ২৪ হাজার মেগাওয়াট বিদ্যুৎ উৎপাদন হবে। গতকাল ৬ মে শনিবার আখাউড়ার বনগজ ঈদগাহ মাঠে নতুন বিদ্যুৎ সংযোগ লাইন উদ্বোধনকালে প্রধান অতিথির বক্তৃতায় তিনি এসব কথা বলেন। সূত্র-সমকাল (পৃ. ৭, ক.৬)।

৮। **শিক্ষায় পিছিয়ে থাকলে স্বনির্ভর হওয়া যাবে না : শিক্ষামন্ত্রী**

শিক্ষামন্ত্রী নুরুল ইসলাম নাহিদ বলেছেন, স্বাধীনতার মূলে ছিল দারিদ্র্য, বৈষম্যমুক্ত ও স্বাধীনভাবে জীবনযাপন করার আকাঙ্ক্ষা। অথচ এখনও আমরা দারিদ্র্য, অভাব অনটন ও ক্ষুধামুক্ত হতে পারিনি। আমরা এখনও শিক্ষায় পিছিয়ে আছি। এসব থেকে মুক্তি না পেলে কোনোভাবে স্বনির্ভর হওয়া যাবে না। গতকাল ৬ মে শনিবার সিলেটে একটি আর্থিক সহায়তা প্রদান অনুষ্ঠানে শিক্ষামন্ত্রী এ কথা বলেন। সূত্র-সমকাল (পৃ. ১৯, ক.১), ইন্ডিপেনডেন্ট (পৃ. ১৯, ক.৬)।

৯। **শিশু-কিশোরদের জঙ্গি-মাদক থেকে দূরে রাখুন : তথ্যমন্ত্রী**

শিশু-কিশোরদের জঙ্গি ও মাদক থেকে দূরে রেখে গণতন্ত্রমনা অসাম্প্রদায়িক মানুষ হিসেবে গড়ে তোলার আহ্বান জানিয়েছেন তথ্যমন্ত্রী হাসানুল হক ইনু। গতকাল ৬ মে শনিবার ঢাকা বিশ্ববিদ্যালয়ের আরসি মজুমদার হলে রোটারি ইন্টারন্যাশনাল বাংলাদেশের শিশু-কিশোর সংগঠন আরলিএক্ট ক্লাবের বার্ষিক সম্মেলনে তিনি এ কথা বলেন। সূত্র-সমকাল (পৃ. ৫, ক.১)।

১০। **জঙ্গিবাদ দমনে নতুন একটি ইউনিট হচ্ছে : আইজিপি**

আইজিপি এ কে এম শহীদুল হক বলেছেন, দেশে জঙ্গিবাদ দমন নিয়ে কোনো প্রশ্ন তোলার সুযোগ নেই। শতভাগ স্বচ্ছতা নিয়েই জঙ্গিবাদ দমন করা হচ্ছে। প্রতিটি অভিযানের সময় আইনশৃঙ্খলা রক্ষাকারী বাহিনীর পক্ষ থেকে জঙ্গিদের আত্মসমর্পণের সুযোগ দেওয়া হয়। গতকাল ৬ মে শনিবার ব্রাহ্মণবাড়িয়া জেলা পুলিশ লাইনে

আয়োজিত বার্ষিক পুলিশ সমাবেশ ও ক্রীড়া প্রতিযোগিতার উদ্বোধন শেষে তিনি এসব কথা বলেন। সূত্র-ইত্তেফাক (শেষ পৃ.,ক.৪), ভোরের কাগজ (শেষ পৃ.,ক.৫), এশিয়ান এজ (পৃ.১,ক.৪)।

সম্পাদকীয়

- ক. **ইত্তেফাক, নিউ এজ** : এসএসসির ফলাফলের ক্ষেত্রে গ্রামের শিক্ষার্থীরা শহরের শিক্ষার্থীদের তুলনায় পিছিয়ে থাকার কথা উল্লেখ করে এ পার্থক্য কমিয়ে আনতে গ্রামের স্কুলগুলোতে পর্যাপ্ত শিক্ষাগত আধুনিক অবকাঠামো তৈরির পাশাপাশি মেধাবী শিক্ষক নিয়োগ ও তাদের দক্ষতা বৃদ্ধির উদ্যোগ নেওয়ার ওপর গুরুত্বারোপ।
- খ. **প্রথম আলো** : চালের দাম অব্যাহতভাবে বেড়ে যাওয়ায় তা নিয়ন্ত্রণে কঠোর ব্যবস্থা নেওয়ার সুপারিশ।
- গ. **সমকাল, যুগান্তর, ভোরের কাগজ, যায়যায়দিন, ডেইলি সান** : ভারতে অন্ধ্র প্রদেশের সতীশ ধাওয়ান মহাকাশ কেন্দ্র থেকে 'দক্ষিণ এশিয়া উপগ্রহ' সফল উৎক্ষেপণকে স্বাগত জানিয়ে এ উপগ্রহ দক্ষিণ এশিয়া ছাড়াও বিশ্বের সঙ্গে বাংলাদেশের সহযোগিতাকে এক নতুন মাত্রায় নিয়ে যাবে বলে প্রত্যাশা ব্যক্ত।
- ঘ. **ইন্ডিপেন্ডেন্ট** : দেশের সব জেলাকে রেল নেটওয়ার্কের আওতায় আনার পাশাপাশি রেলকে চারটি জোনে ভাগ করার পরিকল্পনাকে স্বাগত জানিয়ে রেল কর্তৃপক্ষকে এ পরিকল্পনা বাস্তবায়নে যথাযথভাবে কাজ করার সুপারিশ।
- ঙ. **ডেইলি সান** : ব্যবসায়ী, সরবরাহকারী ও খুচরা বিক্রেতাদের ওপর ১৫ শতাংশ ভ্যাট আরোপের প্রভাবে পণ্যসামগ্রীর মূল্য বেড়ে যাওয়ার আশঙ্কা করে এর পরিবর্তে কর সংগ্রহ পদ্ধতিতে দক্ষতা নিশ্চিত করার ওপর গুরুত্বারোপ।
- চ. **ডেইলি স্টার** : লালবাগের কিন্নার মোড়, ইসলামবাগ ও কাজী রিয়াজউদ্দীন সড়ক এলাকার ওয়াসার পানি দূষিত হয়ে নিরাপদ খাবার পানির সংকট তীব্র হওয়ায় কর্তৃপক্ষকে দ্রুত সমস্যার সমাধানে উদোগী হওয়ার আহ্বান।
- ছ. **নিউজ টুডে** : তাঁত শিল্পের উন্নয়নে প্রধানমন্ত্রীর উদ্যোগের বিষয় তুলে ধরে পৃথক বেনারশি পল্লি, খাদি পল্লি ও তাঁত পল্লি গড়ে তুলে তাতে পর্যাপ্ত বিনিয়োগের ব্যবস্থা করার আহ্বান।
- জ. **নিউ নেশন, ডেইলি স্টার** : প্রস্তাবিত সড়ক পরিবহণ আইনে সড়ক নিরাপত্তার বিষয়টি উপেক্ষিত হওয়ায় বিষয়টি গুরুত্বের সঙ্গে বিবেচনায় নেওয়ার সুপারিশ করে সম্পাদকীয় প্রকাশ করেছে।

উপ-সম্পাদকীয়

ইত্তেফাক পত্রিকায় প্রকাশিত কলামে দেশে বর্তমান মৌলবাদী উগ্রতা ও আন্দোলন মোকাবিলা করার জন্য সচেতন মহলের ঐক্য ও গণপ্রতিরোধ প্রয়োজন বলে উল্লেখ করা হয়েছে।

নিবন্ধ ও ফিচার

সংবাদ পত্রিকায় প্রকাশিত 'শব্দ দূষণ রোধে চাই কার্যকর পদক্ষেপ' শিরোনামের নিবন্ধে মোহাম্মদ হাসান জাফরী শব্দ দূষণ প্রতিরোধে কোটি মানুষের শারীরিক ও মানসিক স্বাস্থ্যের কথা বিবেচনায় রেখে বাস্তবমুখী পদক্ষেপ নিয়ে সচেতনতা সৃষ্টির মাধ্যমে আমাদের সবাইকে যার যার অবস্থান থেকে এগিয়ে আসতে হবে বলে অভিমত প্রকাশ করেছেন।

#

ডালিয়া/শুকলা/মরজিনা/সাইদা/রশীদ/তানিয়া/২০১৭/৯.০০ ঘণ্টা

